



Rendaquint 2020 - deliberaziun a man da la RC

La suprastanza cumünala ha deliberà in üna sezzüda cumünaivla cun la cumischiun sindicatoria il bilantsch ed ils rendaquints dal quint da gestiun e dal quint d'investiziun a man da la radunanza cumünala da rendaquint. Ils resultats pel 2020 sun allegraivels e fan spranza per l'avegnir finanziel dal Cumün da Zernez.

Avegnir sgürezza lavinas Brail

L'on 2019 ha il Cumün da Zernez dat l'incumbenza a l'Uffizi da god e privels da natüra dad elavurar ün stüdi a regard la sgürezza d'inviern illa fracziun da Brail (Munt da Brail). Il stüdi ha scuveri tschertas deblezzas ed il listess mumaint muossà sü duos differentas soluziuns per redüer talas. La cumischiun da lavinas ha preschantà quellas e la suprastanza cumünala ha decis sur da la varianta pel proseguimaint dal proget.

Localitats gruppa da gö e biblioteca publica a Zernez - 2021/22 ed in futur

La gruppa da gö es in tschercha da localitats cun quai cha'l contrat scada sün la fin da lügl 2021. Inavant es la biblioteca publica a fit fin la fin da gün 2021 illa località da la Chasa Palazzo da Burtel Oprandi. In divers discuors as haja discutà sur da las pussibilitats per l'adöver da las localitats in futur. La biblioteca publica dess restar inavant illa Chasa Palazzo e per la gruppa da gö as haja chattà a partir dals 1-8-2021 üna stanza adattada illa chasa Alossai.

Cussagl da scoula - demischiun Linard Godly e decisiun a regard organisaziun elecziun da rimplazzamaint

Als 12-4-2021 es entrada la demischiun da Linard Godly sco commember dal cussagl da scoula. Tenor constituziun cumünala e ledschas actualmaing valablas ha da gnir manada tras ün'elecziun da rimplazzamaint per quista vacanza. L'organisaziun da quist'elecziun es gnüda approvada e dess gnir manada tras a la votaziun a l'urna dals 26-9-2021.

Sanaziun sablunera ed inchasch aua da baiver Zernez Sarsura - dumonda da princip e d'ün nouv credit

La firma Uli Lippuner AG, Maiavilla d'eira gnüda incumbenzada da la suprastanza cumünala da far ün'examinaziun concepziunala da tuot la rait da l'aua baiver da l'inchaschamaint Sarsura fin i'l reservuar Vallatscha da Zernez. Il preproget ha pudü gnir elavurà infra cuort temp ed aint ill'ultima sezzüda cumünaivla s'haja pudü decider sur d'üna varianta plausibla per üna refacziun necessaria da la rait d'aua da baiver per la fracziun da Zernez. La dumonda da princip es gnüda acconsentida. La suprastanza cumünala propuona a man da la radunanza cumünala dals 22 gün 2021 da deliberar la dumonda da credit da 1.5 mio. chf.

Sanaziun sarinera Zernez - proget da detagl 2021 e preparaziun da las submissiuns 2022 - surdatta lavur

Ils 25-4-2021 ha la populaziun dal Cumün da Zernez acconsenti la dumonda per ün credit supplementar da 140'000 chf per l'elavuraziun dal proget da detagl e planisaziun da la refacziun da la sarinera Zernez. Il gremi respunsabel ha surdat la lavur a la firma Caprez Ingenieure SA, Zernez.

Viafier Retica tunnel da Brail II - proceder d'approvaziun da planisaziun

Da la Viafier Retica es entrada l'annunzcha pel proceder d'approvaziun da planisaziun in connex cul proget tunnel Brail II per tour posiziun. Il proceder es gnü sancziunà.